

弘

簡

錄

弘簡錄卷二百三十一

明刑部員外郎仁和弘齊邵經邦學

皇清翰林院侍講學士四世孫遠平校閱

載記 金諸將一

斜卯阿里

烏謀臣

烏延蒲盧渾

赤蓋暉

迪姑迭

阿從

夾谷謝奴

子查刺

烏孫訛論

阿勒根沒都魯黃楓敵古本

夾谷吾里補

溫迪罕蒲里特

大吳

子碧大

王伯龍

高彪

韓慶民

徙單合喜

烏延蒲輪奴

顏蓋門都

烏延蒲齊黑

斜卯阿里木吉水斜卯部人父渾坦穆宗時與兄鵠謀弑胡麻

谷皆內附數有戰功阿里年十七從父伯討詐都獲其弟沙里

只高麗築九城兄弟攻之遇敵於木里門旬力戰久之阿里挺

槍馳刺其將於陣中敵遂潰又與石適歡討平諸部合兵於徒

門水阿里首敗敵兵取其二城高麗復寇以兵屯守要害不得
進而還阿里追及于曷懶木乘敵爭走水上殺畧幾盡凡一日
之間三破重敵適歡厚賞之幹塞烏睹本攻駝吉城阿里盤塘
爲門會已暮不可入以兵守至旦遂取之烏睹本遣以被甲乘
馬從太祖下寧江州授猛安又從克信與賓州遼兵數萬攻孛
董忽沙里城阿里率百餘騎救之以兵少多裂軍士衣爲旗幟
出山谷間遼兵望見皆遁去蘇復州叛衆至十萬旁近女直皆
保於太尉胡沙家築壘爲固敵圍之數重守者糧芻俱盡牛馬
相啖踪尾人易子而炊夜和告急阿里赴之內外合擊破其衆
於闊離密罕水上勦殺幾盡水爲不流蒲靉古胡什吉水馬韓
島凡十餘戰破數十萬衆契丹奚人聚舟千艘將入于海阿里
以二十七舟邀之中流矢卧舟中夜半始蘇敵舟已入王家島

卽夜取海路追及之敵走險以拒復引騎兵邀擊再中流矢力戰不退竟破之盡獲其舟於是蘇復州婆速路皆平從攻顯州下靈山縣取梁魚務敗余睹兵功皆最後與散睹魯屯高州契丹昭古牙九斤合興中兵數萬攻胡里特寨阿里以八謀克兵救之胡里特先往敗於城下阿里指陣前緋衣者二十餘人此必賊酋麾兵奮擊皆殺之餘衆大潰來州臨州兵圍胡里特城聞其來救卽解圍去開毋討張覺有兵山樓峰口山谷間與散篤魯忽盧補三猛安擊敗之又再敗平州兵及伐宋別擊敗宋兵孟陽之役扼橋渡力戰明年再舉至保州中山累破之進圍真定與婁室路魯乘風縱火焚其樓櫓諸軍畢登進克其城師至河上粘割胡撒擊走宋人扼河津兵數千遂渡河諸將分出大名境阿里破敵兵四百盡殪之圍汴城中兵二萬夜山將焚

攻具與赤盜耶及謀克長孫陽阿禦之其衆大潰還乃攻降趙州六年伐宋主取陽穀莘縣敗海州兵八萬降其城破賊船萬餘於梁山泊招降滕陽東平泰山羣盜復攻范縣擊走之獲船七百艘宗弼將至廬命典烏延蒲盧渾先將二千人往招壽春具舟淮水上時康民聚買船四百與壽春相近术列遠以騎破之斬馘數千比至江連破宋兵獲舟二百艘宗弼至江寧阿里蒲盧渾別降廣德軍先趣杭州去杭十餘里遇宋伏兵二千取我前驅甲士三十人阿里使諸軍去馬搏戰伏兵敗皆逼死於水已乃具舟列于錢塘江宋主奔越訛魯補术列速破其城復走明州宗弼遣阿里蒲盧渾引精兵四千襲之至東關破其兵三千遂濟曹娥江又敗之於高橋鎮未至明州三十里城中出兵戰頗失利乃退軍餘姚宗弼使當海濟師遂下明州執守臣

趙伯諤襲其城復由海路追宋主至昌國縣弗及而還大軍北歸令先趙鎮江宗輔經畧陝西復使先取渭州又趙熙河與斜喝韓常三猛安爲前軍十二年與高彪監護水運遇宋舟師阻亳州河路擊敗之追殺六十餘里獲其將蕭通破漣水寨盡得其大船官民已遁去悉招降之天眷間盜據石州命往討與粘割胡撒所部先登克其城事平會已老宗弼再伐宋令督造戰船宋稱臣詔賜錢千萬爲迭里部節度使歷順義泰寧軍歸德濟南尹天德初致仕加特進封王正隆例降韓國公以疾薨年七十八諡智敏阿里性忠直多智畧自結髮從軍大小數十戰尤習舟楫江淮用兵無役不從時人以水星目之弟愛拔里相與友愛讓已猛安及家財物產盡與之愛拔里不肯受趙避歲餘阿里終與之鵠謀琶性忠直寬厚重節義勇於戰鬪先遣

子寧吉從間道送款穆宗使與活里噶合軍攻降諸部因領其眾後佐撒改破塢塔城屢被賞賚特蒲察部雅里孛董與其兄弟胡八雙括等欲叛歸遼鶴謀弑之送于康宗賜賚甚厚從戰高麗曷懶甸及下陟魯城有功天輔六年卒年七十二天眷中贈銀青光錄大夫父阿鶻土金吾衛上將軍

烏延蒲盧渾曷懶路烏古敵昏山人龍虎衛上將軍孛古刺之子膂力絕人能挽強射二百七十步與兄鶻少虎俱以勇健隸開毋帳下攻黃龍府力戰有功免耳山之敗服覺復整兵來諸將皆不敢戰蒲盧渾獨登山望之給以敵軍少急擊可破若入城不可復制遂合戰破之郭藥師蔡靖以燕京降令率九十騎先伺察城中居民去就遂將漢兵千人隸完顏蒙括攻真定贊皇取之獲人畜甲仗萬餘汴城破時已暮宋人猶力戰槍刺中

其手闢益力。遂敗宋軍，賜金五十兩。元帥宗輔已定關陝，議取
劔外諸州。拔和尚原，承制拜爲河北西路兵馬都總管。又與蒙
廷將萬騎襲宋主于揚州，破其渡江餘兵。從宗弼自淮西渡江，
語在阿里傳。天眷二年，授鎮國上將軍，累安國軍以疾免。皇統
六年，授世襲謀克，病愈爲延安尹，賜尚衣一襲，尋致仕。海陵遷
中都，起爲歸德尹，就其家授以銀牌襲衣。王吐鶻令馳驛之官
淹留，違限復聽致仕。俄召赴京，至薊州見于獵，所從獲一狐。海
陵嘉其老而健捷，賜以御服，封幽國公。除太子少師，進太子太
保。改真定尹，入判大宗正事，伐宋行右領軍、副都督事。師次西
采石，海陵欲渡江，奏宋軍船高大，我舟庫小，恐不可遠。海陵怒，
曰：「汝昔從梁王追趙構於海島，豈皆大舟耶？」今乃沮吾兵事，縱
不能急渡，不過少有損耳。爾年已七十，豈有不死理耶？明日當

與奔睹先濟既而復止之軍還至中都謁世宗除東京留守詔諭卿宿將久練兵事年雖老精神不衰因命到官旬月一視事賜衣一襲進階開府儀同三司大定二年卒年七十三十八年孫札虎遷廣威將軍襲烏古敵昏山世襲猛安并親管謀克

赤蓋卿字仲明其先附於遼居張皇堡故嘗以張爲氏後家萊州生而體貌雄偉慷慨有志畧少遊鄉校遇遼季以破賊功授禮賓副使領萊熙遷潤四州屯兵天輔六年來降仍命領其衆從開丹定興中府義錦等州及破張覺皆與有功以粟萬五千石助軍授洺州刺史孟陽之戰敵中軍徑薄宗望管卿與諸將擊敗之追殺至城下訖師還數立戰功明年再舉預攻下保州真定進圍汴遇城中出兵拒戰無不勝捷還攻河間敵將李成援以雄莫之兵暉引所部迎擊馬傷而墮輒奮起步鬪竟敗成

兵是日凡七戰皆勝敵人多逼死濠陰間暉兩臂亦中數矢賊將劉先生兵二萬乘夜襲營與戰達旦賊始敗走皆溺死于水暉復傅城力戰如是連月諸軍四面合攻遂克之加桂州觀察使因留撫河間時居民皆爲軍士所掠老幼存者亡幾下令軍中聽贖還之未幾皆按堵如故從宗輔下青州復從闡毋攻濰州方督裨校先登城中縱火機石亂發仍衝冒而下力戰敗之軍還復以三十騎破敵于范橋帥府承制加靜江軍節度使進攻城砲發幾中裂其甲裳攻益奮卒破其城又從克泗州還屯汶陽破賊衆于梁山樂獲舟千餘移攻濟州既敗敵兵因傳城諭以禍福舉城出降約束軍士無秋毫犯自是曹單等州皆聞風而下從攻壽春歸德及渡淮皆爲先鋒遇重敵于平江皆擊敗之遂至餘杭通糧餉治橋道其力居多還載資治通鑑版以

歸大軍過江寧徙其官民北渡天大暑多疾疫老弱轉死知府陳邦光訴于宗弼怒將殺之呬曰此義士也力爲營救得免富平之戰左右翼遇澤而敗宗輔念其前功杖而釋之師至熙河別降諸寨將及吐蕃酋長等獲民戶萬五千餘蘭州叛與訛魯補等攻下之獲河州安撫使白常熙河路副總管劉維翰以獻還攻慶陽兩敗重敵殺其將戴果師還遷歸德軍節度使宋州舊無學舍始爲營建生徒肄業者復其身人勸趨之屬縣民奴王夔嘗修舉業贖以錢使卒其業後至顯官密州吏龐乙卒其孤貧不克葬爲營治之且資給其家十三年復從大軍渡淮還鎮母憂起復舊職齊廢爲安化軍節度使天眷三年復河南宋人乘間陷海州帥府委以經畫登萊沂密四州敵無敢窺其境者尋轉定海軍改濟南尹累進光祿大夫以罪罷久之起爲昌

武軍節度使天德二年遷南京留守又爲河南路統軍使授世襲猛安拜尚書右丞封河內郡王歲餘除平章政事封戴王正隆初出爲興平軍節度使二年降王爵爲樞密副使封景國公未幾復爲左丞封濟國公終大興尹景國公年六十五大定間謚曰武康子師直登進士第

迪姑迭與阿徒罕俱溫迪罕部人祖扎古廼父阿胡迭世爲胡諭木部長迪姑迭代領謀克攻寧江州敗遼援兵獲甲馬財物攻破奚管回至韓州遇敵二千人擊走之幹魯古與遼人戰于咸州兵已却亟引本部兵力戰諸軍復振遂大破之護步答岡之役乙里補孛董已陷敵中又援出之攻黃龍府身被數創授世襲猛安天輔七年從上至山西病卒年四十七天眷中贈光祿大夫阿徒罕年十七從撒改幹帶等討平諸部皆身先力

戰從幹寨禦高麗于曷懶甸以爲前鋒謀知兵屯海島亟率衆三十夜渡焚其營柵戰艦兵遂大敗始下馳吉城旣而八城皆下論功爲最遷兵自寧江州東門出復迎擊盡殪之授以謀克從克黃龍府力戰身被數十創竟登其城又與烏論石準援照散城請乘不備急擊之遂夜過益褪水詰朝大敗之幹魯上其功賜幣與馬天輔四年五月病卒年六十五上悼惜遣使弔祭賻之以馬爲人孝弟好施惠力健捷善弋獵至角觝擊鞠咸精其能

夾谷謝奴隆州納魯悔河人祖阿海國初率所部來歸獻器用甲仗父不刺速襲本部勃堇從伐遼授世襲猛安親管謀克爲曷懶路都統謝奴長身多髯善騎射通女直并丹漢字太祖命佩金牌總領左翼護衛西京未下以獲城中生口知其潛遣人

求救於外部統府得爲禦備却其救兵西京乃下自燕京還遇
判泥恩納阿遇敵於隘謝奴身先士卒射殺先鋒二人敵遂潰
走總管蒲魯虎贈以甲及馬從攻和尚原山仙人關宋人據險
猛安雖詆只突戰不克謝奴選麾下五十人戰克之與吳玠相
拒烏里雅行陣不整吳玠乘之謝奴領兵逆戰遂大破敵計前
後功襲其父猛安謀克宗弼復取河南陝西宋人欲潛兵襲取
石門諸營謝奴自渭南大禹鎮掩其伏兵射中軍帥宋兵敗走
多獲旗幟兵仗因獲厚賞除華州防禦使入爲工部侍郎至尚
書出授平涼尹昭義軍節度使大定初卒 子查刺狀貌魁偉
善文直昇丹書天德初以功臣子充護衛二年授武義將軍朱
幾推符寶郎凡再考山爲灤州刺史改知平定軍事南征爲武
威軍副都總管大定二年改刺景州遷同知京兆尹議破吳玠

語在合喜傳德順既下入爲殿前右衛將軍襲父猛安改左衛
遷右副都檢丞相良弼稱爲國器遇有疾親往視之九年出爲
東北路招討兼德昌軍節度使賜以金帶到官治有勤績邊境
以安其斷獄公平道不拾遺遷臨潢尹兼本路兵馬都總管蕃
部長服十三年改西北路招討使上遣使宣諭諸部初附命汝
撫綏當使治聲達於朕聽尋卒于官爲人性忠實內明敏不學
而知每論大事超越倫輩太師勗嘗以方之古人云

烏孫訛論善騎射襲父撒改謀克從蒙剗攻東京及廣寧擊北
京山賊皆有功蕭孛堇來攻恩州訛論以六十騎偵伺逮夜遇
敵數百騎掩擊之生獲三人知其衆九萬且至亟語蒙剗爲備
遂破孛堇從宗望伐宋破尉氏中牟援兵并取其城還以兵百
五十破敵一千於滄州西明年再舉蒙剗戍開州訛論以騎四

百守河復收千餘人斬首七百宗弼渡淮聞王善兵扼其前使
訛論率兵二千破之和州北李成兵七萬又據烏江直前敗之
宗弼遂渡江至江寧十五年沂州寶防禦叛敗而獲之錄前後
功授世襲猛安加昭武大將軍宗弼再取河南以五十騎敗楊
家賊五百於徐州東以功受賞不可勝計天德二年除唐州刺
史移淄州遷石埭部族節度使行至北京病卒 阿勒根沒都
魯上京納鄰河人後徙咸平路梅黑河雄偉美鬚勇毅善射
從伐遼在軍中所戰皆克每遇敵往來馳突人莫敢當皇統元
年計功擢宣威將軍明年授遼軍節度同知改移刺都札詳
穩授世襲本路寧打渾河謀克爲滑州刺史改肇州防禦使蒲
與路節度使累遷驃騎及金吾衛上將軍以年老致仕卒年七
十三 黃柁敵古本世居星顯水從破寧江取咸州平東京路

及諸山寨柵皆有功從麻吉破遼將和尚節使兵七千於上京復破那野軍二萬再從麻吉遇敵於阿鄰甸麻吉被創不能戰敵古木率兵擊敗之勦殺殆盡從攻回鶻城破其兵九萬又敗木匠直撒兵於山後俘獲甚衆及昭古牙之兵三千獲其家屬而還攻平州張覺引兵救吾春被圍於西山解其圍并獲糧五千斛招降戶口甚衆從平吳中撫安其民又從伐宋取滑開德大名濟南高唐棣密等州皇統間以功襲謀克移屯於壽光縣界六年授世襲千戶終棣州防禦使 蒲察胡蓋案山許水人年十八從軍襲其父特斡謀克天輔間夏兵三萬出天德路從婁室迎戰領兵三百敗敵三千天會三年攻太原以所領千戶軍擊城中午萬餘又敗援兵三萬餘於榆次境六年從婁室攻京兆屢與宋人接戰皆先登有功七年取邠州爲左翼千戶遇

宋兵二十餘萬右翼少却胡蓋摧鋒陷戰敵遂敗去戰富平敗
張浚復有功十三年擊關師古衆三萬餘於臨洮從攻涇州破
德順秦鞏臨洮河蘭等州敗吳玠兵皆有勞勩授德順州刺史
改隴州防禦使鳳翔尹卒年五十五 夾谷吾里補暗土渾河
人徙天德父兀屯討烏春窩謀罕有功吾里補棟婁室帳下攻
係遼女直招降太尉照三等從救幹魯古于威州敗遼兵押魯
虎城其軍營遼水乘夜引五謀克軍擊之遼軍驚潰殺獲幾盡
從伐高永昌預伏四十騎于要津以數騎奮擊于遼水之上獲
其生口盡知虛實太祖嘉之賞奴婢八人永昌駐軍於兔兒陀
先據津要軍不得渡吾里補與撒八射殺其先鋒二人敵衆稍
却大軍遂渡遼水及攻廣寧復與赤蓋忽沒渾各領所部突入
其陣大軍繼之遂拔廣寧攻臨潢面被重創奮擊自若賞以遼

宮女二人元帥杲已取中京令尹四十騎覘敵獲喉舌人因知遼主所在後從幹魯定雲中從宗翰屯應州遼軍在近境將所部擊敗之從宗望伐宋受蔡靖降婁室攻陝西諸郡復叛又攻敗之與張浚戰富平皆先登宗輔賞以金器名馬後爲先鋒攻下蘭州城加昭武大將軍授世襲猛安累官學特本部族節度使以老致仕封芮國公吾里補生平多智畧膂力過人雖老勇健不衰大定初劇賊嘯聚山特鄆關輒率鄉里年少逆擊之賊黨潰去事聞賞賚甚厚二十六年一百有五歲卒溫廸罕蒲里特隆州移離閔阿胡勒出寨人魁梧美悍有謀畧以智勇聞都統杲取中京令權猛安領軍五千與契丹戰敗其衆萬餘及出袞古里道收敵八千至臘門華道復設伏兵敗敵萬人太祖定燕自儒州至居庸關執其喉舌人有頃吷三千餘復寇臘門

華道蒲里特整隊先登賊識其旗幟望風而遁遂奮擊之親執賊帥皇統元年從宗弼伐宋留軍唐州敵衆奄至蒲里特擊之大者軍萬四千號二十萬率親管猛安衝擊身先士卒敵少却仍張左右翼併擊敵衆散走別遇援兵二萬復擊走之時邳州土賊嘯聚幾二十萬引軍三千分爲數隊急攻之賊潰去南京路遇敵軍二萬自城中山亦擊敗之三年遷定遠大將軍鳳翔尹同知六年陞京兆尹轉寧州刺史改西北路招討都監遷永定軍節度使海陵南征改武衛軍都總管大定三年歷開遠泰寧軍節度使卒子兀帶授武功將軍本猛安奚出痕世襲謀克烏延胡里改曷懶路星顯水人後授愛也窟謀克因家焉從闊毋固平州有功及伐宋圖汴五謀克與宋兵萬人遇于城南胡里改先馳擊敗之天會五年改宗乘縣敵棄城走恩州因追

殺千人獲車四百兩七年討平泰山羣盜毀其營柵獲破兗州
羣寇三千餘保據山險皆獲賫賚八年攻廬州爲先鋒至柘皋
鎮宋遣七人持書與劉四廂請皆執之進攻和州北至含山縣
五里諜知宋三將兵且至亟伏軍路左獲姚觀察連賫戰馬通
前後共八匹牛二十二頭九年定陝右以所部敗敵千人生擒
甲士得敵虛實又從蒲魯渾狗地熙泰敗敵兵二千監軍按補
遣領四猛安攻襄陽宋兵三千渡江方營壁壘乘其未就突戰
破之宗弼復河南遣引甲士三十捕偵候人至蔡州西遇兵八
十餘戰敗之獲南頓縣令及攻陳州半夜聞敵開門潰走亟領
二謀克軍追襲猛安突葛逃軍亦繼至遂大敗之皇統中遷定
遠大將軍臨洮少尹兼熙泰路兵馬副都總管累改京兆平陽
府同知兼京兆河東南路兵馬都總管貞元三年轉曷懶路總

管同知大定中歷胡里改歸順顯德軍節度使卒于官年六十
九詔授其子名五十六武功將軍世襲本路婆朮火河謀克
大臭本名撻不野其先遼陽人世仕遼有顯者太祖伐遼因徵
兵在選中遼兵敗臭脫身走寧江軍又破越城而逃爲我兵所
獲見于太祖問其家世因收養之收國二年爲東京奚民謀克
時初破高永昌諸旁郡邑未盡服屬使臭伺察反側有聞必達
太祖嘉其忠實改授猛安兼東京留守同知取中西兩京隸屬
毋軍遼軍二十萬來拒使以本部守營臭監請出戰曰丈夫不
得一決勝負尚何爲哉苟臨戰不捷雖死猶生也闕毋問而壯
之乃遣出戰旣合闕毋軍少却遼兵後躡之亟麾部兵橫擊殺
數百人猶是顯名天會三年宗望謀伐宋以信德府居燕汴之
中可駐軍以濟緩急欲遂攻之恐不能亟于議尚未決臭先率

所部選善射者射其城樓別引輕銳潛升于樓角之間遂克其城軍至濬州宋人已燒河橋宗望下令有能先濟者功爲上臭捕得十餘舟使勇悍者徑渡擊其守者復奪戍柵由是大軍畢濟命領渤海軍人猛安爲萬戶賜以金牌旣克汴京以爲河間路都統會開毋怒其不早降欲縱軍大掠因諫而止已掠者官爲贖還尋除河間尹從攻襲慶府預命軍士咸備番鍾柴薪甫傅城未及鳴鼓輒引先登軍帥欲罪之朝廷弗許仍以例賞從追康王已濟淮宋將時康民來拒臭率本部從擊敗其兵十七萬復以騎二千與當海擊敗淮南賊十萬斬級萬餘王善來降將及江臭軍先渡舟行去岸尚遠宋列兵江口臭視其水可涉亟麾兵捨舟趨岸疾擊宋兵走之大軍相繼而濟宋主自越奔明破宋樞密使周望軍于秀州又敗宋兵于杭之東北師還留

爲揚州都統經畧淮海高郵之間再爲河間尹兼總河北東路
兵馬十一年入見太宗賜坐慰勞甚久特遷太子太保賜衣一
襲馬二匹及鞍轡鎧甲改元帥右都監齊國廢命守汴京熙宗
念臬久勞降御書寵異之天眷三年罷漢渤海千戶謀克以臬
舊臣獨命依舊世襲千戶拜右監軍宗弼再伐班師留臬行元
帥府事皇統三年加開府儀同三司八年進左監軍天德二年
改右副元帥兼行臺左丞平章政事進行臺右丞相久在河南
將帥畏而附之復轉左丞相使伺察撤弼喝俄名入朝拜尚書
右丞相封神麓郡王四年請老爲東京留守貞元三年拜太傅
領三省事累封漢國王十二月上幸其第問疾太臬薨年六十
八駕親臨哭詔有司廢務禁樂三日贈太師晉國王諡傑忠遣
使護喪歸葬正隆例降太傅梁國公子磐本名蒲速越爲人

執迷自用累官登州刺史襲父猛安因治狀不善下降蒿州大定五年從僕散忠義伐宋有功名爲符寶郎遷拱衛直都指揮使賦性剛暴每所進官心嘗少之頗形于言改左衛將軍受詔訪良弓多自取之又善易護衛入直者護衛妻室告其事詔點檢司詰問時繫姝在宮中爲寶林屬內侍僧兒爲訴于上因父功不忍廢棄姑貴爲隴州防禦使俄改范州遷武寧軍節度使因事除名起爲韓州刺史改祁州坐無罪掠死染工妄認良人爲奴解職卒大懷貞字子正皇統五年除閤門祇候三遷東上閤門使丁母憂起復符寶郎累官右宣徽使正隆伐宋爲武勝軍都總管大定二年除洺州防禦使兼押軍萬戶改沂州再遷彰國安武軍節度使縣尉獲盜囚旗上圖亢宿誣爲謀叛株連萬人惟誅亂首十八輩餘皆釋之嘗因私忌飯僧就中山西

一僧異常詰之果爲盜者人以二事服其明察改典中尹錦州富民蕭鶴壽殺人匿府少尹家有司捕不得因以計取實于法改彰德軍節度使卒

王伯龍潘州雙城人遼末聚黨爲盜天輔二年率衆二萬及其輜重來降授世襲猛安知銀與雙州三年太祖攻臨潢命與韓慶和護糧餉慶和將兵前行伯龍居後遇遼兵五千餘邀于路伯龍率輓夫千五百人擊敗之獲馬五十四匹四年從攻下中京并克境內諸山寨除靜江軍留後五年授節度使從討張覺先登馳擊手殺數百人遷右金吾衛將軍白河之戰伯龍當其左軍麾兵疾馳蹂之宋軍亂我師乘勝奮擊敗之伐宋爲先鋒次保州破敵兵五萬招降新樂軍民十餘萬大軍圍汴宋太尉何臬軍數萬出酸棗門命引本部遮擊多所斬獲以治攻具有功

兼保州兵馬安撫同知進破孔彥舟鄆瓊衆三萬於洺州又攻
拔北平取保州河間從宗輔經畧山東青州城中夜出兵襲其
營伯龍不及甲獨被衣挺刃拒營門敵不得入因奮擊殺數十
人已而軍士皆甲殺傷宋兵不計并獲一將斬之論功第一六
年還攻莫州降其城加太子少保莫州安撫使攻濮州破李固
寨十餘萬衆濮州守鎔鐵揮我軍不能尅伯龍被重甲首頂大
釜挺槍先登殺守陴者十餘大軍相繼而上遂克之進攻徐州
復先登克徐宿邳三路軍馬都統敗高托山之衆十五萬于清
河進擊韓世忠於邳州走之與大軍會於宿遷追世忠至揚州
還攻泗州守將以城降屯軍磁陽破賊陳宏衆四十餘萬及破
黃戩於單州攻歸德府遣立攻具從二十餘騎行視地形城中
出兵千餘欲生得伯龍縱騎馳之敵兵亂墮墮死者幾二百人

又破王善之衆於巢縣取廬和州其功居多渡采石擊敗岳飛
劉立路尚等兵獲芻糧數百萬還過真揚道遇鄺瓊世忠軍復
戰敗之改知澤州平太行羣盜之嘯聚者天眷元年爲燕京馬
軍都指揮使復收河南權武定軍節度使兼本路都統擊走宋
兵據許州者招其人民復業是年秋討平泰安卒徒張貴驛脅
良民據險作亂皇統元年又從宗弼南伐攻破濠州而還三年
轉武定軍改延安尹寧昌軍節度使天德三年伯龍歷河中益
都尹封廣平郡王卒年六十五正隆例降特進定國公
高彪本名名和渤海人祖安國遼興辰開三鎮節度使父六哥
左承制官至刺史彪始生父用術者言時日不利於已欲不舉
其母爲營護居數歲竟逐之匿於外家時遇調兵東京六哥已
老所親具以實告因名歸代其父行戰於出河店衆兵敗走彪

獨力戰軍帥見其勇令生致之幹魯攻東京六哥率其鄉人迎降以爲榆河州千戶久之告老彪代領其衆爲謀克從都統杲攻中京又從幹魯破遼將合魯燥及韓慶民於高惠之境已而駐軍武安令魯燥以勁兵二萬來襲與所部出戰皆去馬奮擊敗之奚人負險拒命所在屯結彪屢戰有功從攻平州狗地西北道破敵招降石家山寨伐宋爲猛安師次真定率兵士臨城築甬道城中夜出兵焚攻具彪擊走之大軍圍汴屯於東南水門敗宋重兵師還屯河朔復破敵於霸州擒其裨將祝昂河間兵二萬夜襲我營彪率三謀克兵擊敗之天會五年授靜江軍節度使壽州刺史復伐宋令引所部徇地山東攻城克敵數被重賞七年師至睢招誘京西人民次柘縣其官吏出降獨與五十餘騎入城繼而城中復叛彪率其衆力戰敗三千餘人撫安

其民而還從襲康王至杭州還遇宋將韓世忠扼阻至黃天蕩敵舟三十餘來過其一先至載兵士二百餘率勇士數十引鈎拽之躍入其舟所殺甚衆餘皆死水中明年從攻陝西師至寧州與宗人昂率兵三千取廓州始至有來降者詒言城東北隅守兵將謀爲內應卽夜從家奴二人登城守者覺之彪與從者皆誅死戰諸軍繼進遂克其城從攻和尚原及仙人關皆預齊國旣廢命爲都統攝滕陽軍以東諸路兵馬撫諭徐宿曹單滕陽及其屬邑皆安堵如故晚節爲武軍節度使頗積貨嘗坐賊游陵以其勲舊杖而釋之改忻州防禦使復領節安化安國武勝三軍遷行臺兵部尚書改京兆尹封鄴國公丁憂起復改節武定軍轉歸德尹正隆例受金紫先祿大夫致仕久之復起爲樞密副使封舒國公賜今名卒年六十七諡桓壯生平勇健絕

人能日行三百里。身被重鎧。歷險如飛。及臨敵。身先士卒。未嘗反顧。大小數十戰。率以少擊衆。無不勝。捷性復機巧。通音律。人無貴賤。皆溫顏接之。韓慶民事遼。爲宜州節度使。闢毋攻破。宜州拔。又牙山獲糧五萬石。慶民不屈而死。以其妻配將士。誓死不從。遂自殺。事載太宗實錄。世宗讀之。嘆曰。如此節操。可謂難矣。

徒單合喜。上京速蘇滂水人。世襲猛安。蒲涅之子。形貌魁偉。膂力過人。一經聞見。終身不忘。天輔間。從婁室爲札也。甚愛之。天會六年。以功爲謀克。尋領婁室親管。延安帥府聞其才。命權左翼軍事。皇統二年。爲隴州防禦使。嘗敗宋人於高陵。秦州鳳翔及饒風。關宋兵至。衆以寡勝之。遷累平涼。臨洮。延安。三尹。時關陝以西。初去兵。華百姓多失業。惟守之以靜。多還歸者。天德二

年爲陝西統軍使真元二年兼河中尹正隆六年爲西蜀道兵馬都統世宗卽位其子弟皆自軍中來歸賜以手詔曰岐國失道殺其母后橫虐兄弟流毒兆庶朕惟祖宗創業艱難勉膺大位卿國家舊臣豈不知天道人事陝右重地非卿無能措畫卿軍不多領屯境上未宜深入俟兵革旣定卽當召卿復以爲統軍使未幾改元帥右都監表陳伐宋方畧許以便宜從事轉左都監押軍萬戶裴滿援刺猛安移刺沙里刺破宋兵于華州宋將吳璘兵十餘萬侵古鎮據散關和尚原神義口玉女潭大蟲領石壁寨寶鷄縣陷河州鎮戎軍表乞濟師益以河南兵萬人時德順受圍遣丹州刺史赤盞胡速魯改以兵四千守之統軍都監石林迭勒將兵萬人破宋河州兵還駐平涼求益兵以解德順之圍合喜遣萬戶完顏習尼列大良順寧州刺史顏盞門

都各將本部兵合二萬人押以順義軍節度使烏延蒲离黑與
迭勒會璘聞使偏將領兵五千來迎前鋒特里失烏也奚王和
尚擊敗之追至德順城南小溪邊璘自將大軍蔽岡阜而出烏
也等馳擊之迭勒蒲离黑繼至併力鏖戰日已暮兩軍不相辨
乃解已而兩國講和請各罷兵皆引還自圍城至是凡四十餘
日押軍猛安溫敦蒲里海在圍中身先士卒力戰未嘗少挫論
功居多頃之璘復來犯陝西引軍十萬據險阻剽掠郡邑復請
益兵詔加以七千與舊號二萬遣慶陽尹烏延蒲轄奴延安尹
高景山分領以往節度使彰化軍璋通遠軍烏延吾里補刺史
寧州移刺高山奴恩州完顏謀良虎京兆少尹宗室泥河皆備
軍前任使宋兵五萬圍華州押軍萬戶裴滿接刺欲堅壁守之
猛安移刺沙里刺曰宋兵雖多半是商號華州并南山居民不

習戰聞不如擊之。援刺乃引騎兵千人敵宋前鋒。追至大軍亦敗。斬首五千餘級。宋戍寶雞至大蟲嶺。兵皆遁去。旣而璘聞我兵已去。率兵復據德順。陷鞏州。臨洮府。臨洮少尹紇石烈驤洽死之。詔贈一階。賜錢五百貫。時我兵甚少。璘雖屢敗。恃其衆不肯去。仍分其半守秦州。合喜遣總管夾攻。查刺與諸將議破敵計。策璋與門都言須都監親至。敵必退。合喜乃領兵四萬駐水洛城東。自六盤山西抵石山頭。分兵守之。當德順秦州之兩間。斷其餉道。璘乃引去。守德順張安撫亦棄城。逡速魯改邀擊之。所殺過半。擒將校十餘人。遂復德順秦州。守兵亦退。景山乃定。商鞫泥河復取環州。而臨洮秦鞏華河隴蘭會原洮積石鎮戎等州府一十六盡復之。陝西平。詔書獎諭。賜以玉帶將士各照等級。遷資受賞。贈官賜錢有差。時年已老。上以陝西軍事委統

軍使璋諭以凡鎮防利害可訪問之。七年入爲樞密副使。改東京留守。賜以衣帶佩刀。九年拜平章政事。封定國公。奏肅宗收復陝西功數事。命藏祕府。十年合喜薨。上罷擊鞠祭葬。致禮賻銀絹重綵二十一年。遷其孫三合武功將軍襲本猛安。曷懶若翁申謀克泰和元年配享世宗廟庭。烏延胡里補曷懶路禪嶺人徙大名路。天會中從其父達吉補隸右監軍撻懶麾下。因隨赴闕。領父謀克從攻滄州。方夷濠隍城中。兵來拒擊。却之王師下青州。力戰有功。獲馬百匹。降賊黨甚衆。青州戍將覲吉補攻萊州。請濟師。帥府遣將十二謀克兵以往。降其四營。攻拔一營。得戶四十。又敗賊兵五萬于恩州。攻破其營。降戶五萬。獲牛畜萬餘。將至臨清。敗敵兵三千。俘獲甚衆。生擒賊首以獻帥府。嘉其功。賞以奴婢百牛三十。又因覲吉補敗于恩州之境。以兵

四千往救破敵萬餘宋兵十萬在單父間命從總管宗室移刺
屋選步卒一萬騎兵四千往討遇敵先登力戰有功大軍經畧
密州將兵二千爲前鋒遇敵萬人于高密遂敗其衆追至城下
殺戮殆盡獲馬牛三千餘又與李太欲敗賊王義軍十餘萬于
州南是夜賊兵數千來襲營復以兵橫擊走之後從大軍攻楚
揚通泰等州天眷二年世襲猛安寧遠大將軍皇統七年益以
親管謀克天德三年除歸德尹同知正隆初爲唐古部族節度
使大定中復轉保大通遠兩軍進階龍虎衛上將軍卒于軍中
顏蓋門都隆州怕里千山人長身美鬚天會間從其兄羊艾
在軍中方取汴京其兄戰歿遂以代之宗輔定陝祐以爲蒲輦
隸監軍杲親管萬戶攻饒風關至坊州杲欲與總管蒲魯虎會
於鳳翔遣領六十騎先往期會及還備得地形險阨賞銀五十

兩後宗弼駐軍山東遣人特召至令齎廢齊及安撫百姓詔書往諭還日賞以良馬銀絹事畢復遣從杲天眷初叛將李世輔僞邀杲至私署以獻甲爲名劫以兵執之而去門都突出以告押軍猛安完顏撻懶同率兵追及杲始得脫以功遷明威將軍復從杲招復陝西至鳳翔諸路多反覆不一杲授門都牌劄令往撫定所至多張甲兵從者安之速者討之遠近帖然無復叛者杲甚嘉之皇統初遷廣威將軍四年授通遠軍節度同知改知保安軍事天德中累遷丹與寧州刺史俱兼知軍事大定初拜勇烈軍都總管領軍復秦隴語在前傳事平以功遷金吾衛上將軍授通遠軍節度使五年改慶陽尹兼本路兵馬都總管卒于官門都性忠厚謹愨安置營壑尤能慎密有敵忽來雖矢石至前泰然自若號令士卒悉如平時故人益安附功乃易成

子六將世襲本路曷懶兀主猛安敵骨論篇申謀克授武功將軍烏延蒲窩黑速頻路哲特猛安人改屬合懶路祖思列預平烏春窩謀罕之亂從伐遼宋皆有功追授猛安贈銀青光祿大夫父國也襲猛安蒲窩黑從太祖伐遼勇開軍中天眷三年襲猛安授寧遠大將軍累官武寧軍節度使遷京兆尹海陵伐宋行武威軍都總管軍還爲順義軍節度使從復德順回改延安并平涼尹致仕封任國公大定十九年卒烏延蒲轄奴同路星顯河人追授猛安謀克忽撒渾之子身長有力多智畧少襲父職階至寧遠大將軍天德二年授陳州防禦使貞元初進昌武軍節度使以善綏撫再任南征改歸德尹爲神策軍都總管當屯濟州北至山東盜已據城蒲轄奴領十餘騎往覘爲衆所圍亟與軍士皆下馬立射殺百餘人賊衆敗走迤邐襲之至

暮而還明日攻破其城號令士卒毋害居民郡中獲安民感其
惠爲立祠以祭大定二年爲慶陽尹以救德順卒于軍年六十
一贈銀青光祿大夫 子查刺力兼數人勇果無敵左右手持
兩太鐵簡皆重數十斤人號爲鐵簡萬戶正隆六年拜丹括里
陷韓州圍信州遠近震駭時因伐宋州縣無備查刺道出咸平
率本部亟還信州與戰敗之已而賊復整兵環攻且登其城查
刺下巨木壓之殺賊甚衆括里乃解去追及于韓州東八里許
身率銳士揮鐵簡左右擊之無不偃仆賊方浚平野爲陣不能
成列遂大敗遁走東京延平隆州民復帖然謁見世宗命充護
衛爲饒騎副都指揮使與窩幹戰于花道大軍未集獨領左翼
六百騎與賊戰殺賊三千餘人蒲察世傑七謀克戰不利因走
其軍賊合圍攻之查刺圍拒而戰遇宗亨以右翼軍來援戰復

引去西過鼻嶺追及于陷泉賊先犯右翼又迎擊之偽護衛阿不沙身長有力奮大刀自後來斫查刺回顧擊以簡背折阿不沙右臂遂與紇石烈志寧合軍擊賊大敗之事平遷宿直將軍賜銀三百兩重綵二十端父憂起復襲猛安除蔡州防禦使改宿州遷昌武軍節度使徙鎮邠州爲賀宋歲元使以善射聞名還擢鳳翔尹入爲殿前右副點檢改興中尹爲嬰速路總管高麗憚其威名凡以事至咸望見跪之二十五年終興平軍節度使查刺貞愨寡言平居和易及臨戰奮勇見者無不辟易雖重圍萬衆出入若無人之境

弘簡錄卷二百三十二

載記 金諸將二

蒲察世傑 字术魯定方 夾古胡刺 夾谷清臣

完顏安國 瑤里字迭 烏古孫兀屯 抹然史挖搭

完顏弼 郭仲元 弟阿隣 完顏霆 包長壽

梁佐 李穀佐 紇石烈牙吾塔 古里甲石倫 粘葛全用 蘇椿附

蒲察世傑本名阿撒曷速館幹篤河人徙遼陽初隸宗弼軍中

家貧多力每與武士角賭羊輒勝之能以拳擊折四歲牛脅而

死有糧車陷淖中七牛挽不能出雙手挽出之東京留守宗敏

召置左右海陵篡以爲護衛語之曰汝勇力絕倫我兄弟有異

志者期以十日除之。則有非常之賞。仍盡以各人家產賜汝。諾而不行。已過十日。召見大怒。面責之。答曰。臣自誓不以非道害物。雖死不敢奉詔。然愛其舅。亦不之罪。會將伐宋。遣往曷懶籍。兵他使者。惟恐不及。得數恆多。世傑所籍數少。因恠問之。對曰。曷懶地接高麗。今若多籍其丁。卽有緩急。何以爲備。海陵喜曰。他人用心。不能及也。除安國軍節度同知。賜銀絹綵帛并馬二疋。到官月餘。會邵闕長吏徵發不已。民不堪命。犯法者衆。獄囚積四百餘。夾遣畧盡。入爲宿直將軍。以事往胡里改路還。奏契丹部族背叛。百姓驚擾不安。今舉國南伐。賊若乘虛入據東土根本之地。雖得江淮。將何所益。宜先討平契丹。南伐未晚。海陵不悅。曰。詔令已出。選將三萬兵屯中都。以北以鎮壓之。又奏若東土大族咸附於賊。恐三萬衆亦未易當。不聽。大軍渡淮。授鄭

州防禦使領武捷軍副總管令以軍三千護糧運東下敗宋舟師數千奪戰船甚衆至和州境擊走宋兵五萬明日使其子兀迭領二百八十騎爲應兵自領八百騎前戰連射六十餘人皆應弦而斃。宋兵遂潰海陵欲觀水戰使領水軍試演宋人舟大而多世傑舟小乃急進至中流取勝而還。大定初復取陝州敗宋兵於石壕鎮又敗援兵三千遂圍陝州宋兵三千自潼關來援引兵二百四十迎擊射殺十餘人兵乃走復敗之於土壕山生擒一將還至斗門城遇宋兵萬餘其將三人挺槍來刺世傑以刀斷之而退復以四謀克軍敗宋兵於土華敵每見其擐甲佩刀腰箭百隻持槍躍馬往來軍中嘆曰真神將也。及再圍陝親選卒二百餘穴地以入拔其城再破宋軍三萬復號州未幾爲衛州防禦使改河南路統軍都監召赴闕慰勞良久除西北

路副統賜廐馬弓矢佩刀從僕散忠義討平契丹改華州防禦使與徒單合喜經畧隴右復德順至東山堡宋兵捍絕樵路世傑率走之追至城下城中出兵二萬來拒與丹州刺史赤盞胡速改敗之殺傷甚衆宋經畧使荆皋棄德順走又追破之遷通遠軍節度使有司執宋人入鞏州境糶米麵世傑畧衆作歸附人縱遣之譯吏蔡松壽告其罪坐貶十八年起爲弘州刺史母憂去職累遷亳州防禦使卒世傑疎財尙氣每臨陣敵衆旣敗必戒士卒毋縱殺掠平居非忠孝不言親賢樂善甚獲當世之譽

李木魯定方本名阿海內吉河人材勇絕倫海陵素聞其名天德初召授武義將軍充護衛數月轉十人長遷宿直將軍賜予甚厚尋爲殿前右衛將軍至左右副點檢世襲猛安出爲河南

尹彰德軍節度使伐宋以爲神勇軍都總管大定二年宋兵二萬襲陷汝州殺刺史烏古孫麻發及漢軍二千河南統軍使宗尹遣定方將兵四千與夾谷清臣往取之行至襄城得敵虛實時汝州東南及北面皆山林險阻不可以騎軍戰宋兵乃由瑯路陽驪汝州屬縣可備糧草二十萬而密引兵趨瑯路絕其往來宋人聞之遂棄城遁去遣輕騎二百追至布祿义擊敗之遂復汝州授鳳翔尹宋人阻邊又行河南道軍馬副統率步騎六萬將由壽州進軍次亳州宋將李世輔陷宿州復從元帥志寧戰於城下時天大暑督戰馳突出入敵陣中數四渴甚因出陣下馬取水爲人所害年四十四上聞閔惜詔有司致祭賻銀絹重綵贈金紫光祿大夫

夾古胡刺上京宋葛屯猛安人初在左副元帥撻懶帳下有戰

功授武德將軍襲其父謀克正隆末山東盜起以爲行軍猛安
遇賊千五百人於徐州南敗之山東路統軍司益選諸軍八百
作十謀克命將之與驍騎軍皆隸點檢司行至淮南海陵遣以
騎兵三百二十往揚州敗宋兵千五百人於宜化鎮後從僕散
忠義伐宋命領萬戶兵由泗州進遇敵於宿州與戰歿于陣贈
鎮國上將軍

夾谷清臣本名阿不沙胡里改路桓篤人姿狀雄偉善騎射皇
統八年襲祖駿達猛安聞世宗卽位率本部軍六千赴中都
以功遷昭武大將軍爲元帥志寧管押萬戶接應左都監完顏思
敬逐窩幹餘黨敗之柔遠前至抹拔里達之地悉擒之賊平遷
鎮國上將軍知領順軍事大定三年五月從志寧復取宿州語
在志寧傳捷聞授宿州防禦使移傅州改西北路招討都監遷

烏古十壘部族節度使歷遷左右副都點檢因典禁兵日侍左
右勤勞久著除爲陝西路統軍使兼知京兆府朝辭賜金帶廐
馬諭以益思自勉二十六年改西京留守閱三歲遷樞密副使
明昌元年立其女爲昭儀眷倚益重二年拜尙書左丞頃之進
平章政事封芮國公四年遷右丞相監脩國史時議簽軍戍邊
上問漢人與夏人孰勇對曰漢人勇何昔元昊擾邊宋終不能
制荅曰宋取軍法不可得知今西南路人殊勝于彼未幾遷崇
進改封戴國公人有以八陣圖來上者上問朕嘗觀宋白所集
武經其載攻守之法亦多難行對曰兵書皆定法難以應變本
朝行兵之術惟用正奇二軍臨敵制變以正爲奇以奇爲正故
無往不克上曰自古用兵亦不出奇正二法耳且學古兵法如
學奕碁未能自得於心而欲用舊陣勢以接敵亦已疎矣尋以

母老許賜告歸省五年二月省覲還謁上御凝和殿問卿母健否其壽幾何別相幾許對曰年八十三別十年幸頗強健上曰何不來此曰急於家務故不欲離耳上曰老人多如是復問胡里改路風俗何如對曰視舊則稍知禮貌而勇勁不及因言西南西北等路軍人其閑習弓矢亦非復曩時六年遷儀同三司進拜左丞相改封密國公受命禦邊行臨潢尙書省事遣人偵敵虛實以輕騎八千令宣徽使移刺敏爲都統完顏安國爲左右翼分領前隊自選精兵一萬以當後隊進至合勒河前隊敏等於枋柁濼攻下十四營回迎大軍屬部斜出掩其所獲羊馬資物以歸遣使獻捷以貪小利責其賄賂阻轍由此叛去大肆侵掠上加譴責代以右丞相襲承安五年降授橫海軍節度使兼滄州管內觀察使尋致仕泰和二年薨年七十子么查刺襲

猛安初議征討命主師事而措畫永方遂致北邊不寧者數歲天下尤之

完顏安國字正臣其先占籍上京世有戰功祖斜婆授西南路世襲合札謀克安國性沉雅有謀畫尤善騎射正隆元年從軍常以少擊衆大定中爲常山簿轉虹縣令遷充虞王府掾遷儀鸞局副使明昌元年改本局使往使大石許其部長入脩歲貢既至率衆遠近至帳望闕羅拜執禮無忒會阻轍迫塞隣部欲立功以誇雄上國議邀安國俱行辭以未奉詔強之不可怵以危言亦不爲動衆壯其人餽以禮還以奉使稱旨升武衛軍都指揮使以左衛將軍充西北路副招討從清臣出兵爲先鋒都統適臨潢泰州屬部叛安國先討定之以功還本路招討使兼威遠軍節度使奉安元年大鹽澤之戰殺獲甚衆詔賜金幣

既而丞相襄總大軍進爲兩路都統大捷於多泉子襄遣安國
追敵僉言糧道難繼不可行安國曰人得一羊可食十餘日不
如驅羊以襲之衆愧其言卽統所部萬人疾驅以薄之降其部
長捷聞進官四級遷左翼都統二年以營邊堡功授簽樞賜虎
符得便宜從事並降邊塞諸部諭使輸貢如初進拜樞密副使
於祖蔭上加授世襲西南路延晏河猛安泰和元年帝幸慶寧
宮特命嚴飭邊備奏乞招誘西南路邊戍私竄者以安人心上
是其言三年以疾致仕封道國公四年復起前職卒上聞輟朝
勅有司葬以執政禮贈特進凡在軍旅幾十五年號令嚴明指
麾卒伍如左右手又善伺知敵人虛實及山川險易戰必身先
士卒故所向輒克諸部入貢者能一一呼其祖先弟姪名字以
伸戒諭聞者震悚甚畏服之

瑤里李迭北京路府白猛安陀羅山謀克人自幼以軍功歷海濱令遷徐王府掾以稱職間察廉升震武軍節度同知明昌初爲唐州刺史歷西北東北兩路招討副使六年正月北兵圍慶州急李迭率本路軍往救敵解去州竟無患永安元年爲丞相襲北伐先鋒副統進軍至龍駝河受圍得解尋授鎮寧軍節度使以六羣牧人叛改寧昌軍拜爲都統領步騎萬人次懿州敵數萬來逆戰兵勢甚張李迭親陷陣奮力鏖擊却之身中二創捷間遷一官二年追敗乂軍千餘出沒剽掠錦懿間奪其所掠悉還本戶三年從宗浩爲左翼都統戰移密河骨堡子西殺獲甚衆五年授知廣寧府俄改東北路招討使捍邊有功賜詔褒諭遷崇義軍節度使泰和六年卒計間遣官致祭賜銀五百兩贈金紫光祿大夫爲人勇決善戰任兵鎮十餘年所向克捷凡

再遷官賜金幣甚爲上倚注云

烏古孫兀屯上京路人大定末襲猛安明昌七年充萬戶備邊
有功除歸德軍節度副使改盤安軍察廉遷速頻路節度同知
以憂去起復歸德府治中遷唐州刺史泰和六年四月遇宋皇
甫斌步騎萬人來攻兀屯兵甚少遣泌陽尉白撒不巡檢蒲閑
各以五十人乘城拒守見宋兵在城東北者可破令軍事判官
撒虎帶引精兵百人自西門繞出營後掩擊之殺數百人宋兵
大亂夜乃遁去五月宋增兵數萬行省遣泌陽副巡檢納合軍
勝來救兀屯設伏城東北以待之三分騎兵一出一入以致宋
兵遂陷于淖伏兵發中衝爲二宋兵大潰追奔至湖陽斬首萬
級獲馬三百匹宋別將兵三千來襲殪之竹林寺軍勝手殺宋
將取其金帶印章以獻擢爲梁縣令遷兀屯河南府同知賞銀

絹重綵爲完顏匡右翼都統取聚賜宋兵五萬夾水而陣以强弩拒岸兀屯分兵奪其三橋自辰至午連拔十三柵遂克神馬坡從攻襄漢亂流徑度復進一階號平南虎威將軍宋人請和遷河南副統軍大安初進昌武軍節度使西南路招討使御下嚴酷軍士多亡杖謫上京留守同知三年將兵二萬人衛中都累遷元帥左右都監兼北京留守有功賜金吐鶻并重綵轉元帥左監軍貞祐元年詔以兵萬六千人守定興軍敗戰沒

抹然史乞搭臨潢路人自幼襲其先世謀克守邊有勞泰和六年授蔡州防禦同知五月宋將李爽圍壽州田俊邁陷新縣平章僕散揆遣與安國軍節度副使納蘭邦烈以精騎三千戍宿州諭以符離乃齊魯之蔽設若不守是無彭城而齊魯亦危至日俊邁果率步騎二萬來襲史乞搭逆擊大破之郭倬李汝翼

間收引衆五萬繼至圍其城兩軍相敵城中叢射敵不能逼會
淫雨敵露處勞倦邦烈乘之遣騎潛出敵後史屹搭突出蹂踐
殺傷數千人援軍又至敵遂夜遁二人躡其後黎明合擊大破
之遂獲俊邁擢爲驍騎將中軍副統十月從行省兵三萬出賴
壽克安豐軍戰霍丘花曆功居多十二月從攻和州中流矢卒
生平形不過中人而拳勇善鬪所用槍長二丈運轉如飛以智
制手箭長不盈握每出散置百數鎗中遇敵抽用以鞭揮之或
手指鉗取飛擲數矢齊發無有不中敵驚以爲神惟已能用之
雖子弟亦不傳其法在北鄙守厭山營敵尤畏之不敢近及死
將士皆惋惜之

完顏弼本名達吉不蓋州猛安人充護衛轉十人長從丞相襲
戍邊功最除德州防禦同知武衛軍鈐轄轉宿直將軍深州刺

史泰和六年從完顏匡攻襄陽破雷太尉兵積功加平南監江將軍母憂起復除南京副留守壽州防禦使大安二年入爲武衛軍副都指揮使遣領兵駐宜德會河之敗弼被創馬中流矢得押軍千戶夾谷王家奴馬而免俄遷右副都點檢至寧元年以禦遼東拜元帥左監軍請自募二萬人爲一軍京師有急可以回戈自救衛王怒曰我以東北路爲憂卿言京師有急何耶就如卿言我自有策以卿皇后連姻故相委寄乃不體朕意願提點近侍局駙馬徒單沒烈曰何不叱去有司論以奏對無人臣禮詔免死決杖降雲內州防禦使宜宗卽位驛召赴中都時雲內已受兵弼善馬稍與數騎突圍而出有詔除定武軍節度使尋爲元帥左都監駐真定條奏軍中五事一外兵日增軍無聞志遇有逃歸自陳戰潰以希存恤收撫見聞習熟相勸成風

自今村寨城邑兵退之後有心力勇敢可使者方招用之二河朔郡縣皆以文自拘不相應救坐致殘破自今嚴督州府凡有告急卽須赴救違者坐之三河北軍器乞權宜弛禁仍令團結望寨以備外兵四今雖議和尙一復來願速講防禦之策五勸遷都南京阻長淮拒大河扼潼關以自固宣宗從之以兼河北西路兵馬都總管車駕至真定奏言皇太子不可留中都恐軍少則難守軍多則難養又奏瑞州軍頗狡左丞盡忠多疑乞付他將言皆川之大名軍變殺蒲察阿里詔弼鎮撫之未幾改陝西路統軍使移文問宣撫副使京兆都總管烏古論兗州擅置秦州權場兗州曰近日入見許山外從宜行事秦州自宋兵焚蕩權場幾一年矣今旣安帖復宜開設彼此獲利朝議亦以對境天水軍移文來請苟利於民專之亦可三年改知東平府事

山東西路宣撫副使遣人招劉二祖餘黨孫邦佐張汝楫以啓
來云我輩自軍興屢立戰功主將見忌陰圖陷害竄伏山林以
至今日實畏死耳如蒙湔洗便當釋險面縛盡招餘賊未降者
弼奏方今多故此賊果降亦了一事乞明示以官賞有詔各還
立官遙授邦佐濰州刺史汝楫淄州刺史皆加明威將軍又薦
二人改過用命招降甚衆來者收其兵仗放歸田里詔遣授邦
佐益都府同知汝楫東平府同知再加懷遠大將軍梁聚寬秦
定軍節度副使加宣武將軍四年弼還宣撫使已而邦佐密告
汝楫復謀作亂弼設饗伏甲廡下密殺汝楫并其黨與手詔褒
諭封密國公其後邦佐屢立功元光末累官知東平府山東西
路兵馬都總管充宣差招撫使弼奏山東河北河東數鎮僅能
自守恐長河之險有不足恃河南嘗招戰士率皆游惰市人不

閑訓練若選簽丁戶數十別爲一軍立功者全戶爲良必將爭先効命以取勝矣武衛軍家屬嘗苦于兵人人懷憤若擇驍悍千餘加以爵賞亦可得其死力又奏老病之官例許致仕居河北者嫌于避難居河南者苟于尸祿職事曠廢乞徧諭覈實其精力可用者仍舊年高昏瞶不事事者罷之又奏賦役煩煩河南百姓新強舊乏諸路豪民行販市易侵土人之利未有定籍一無庸調乞權宜均定如如而輒避事過復來者許諸人補告治以軍法下尙書省議惟老病官從所言餘皆不允元兵圍城百計應戰久之乃解賜詔獎諭將士賞賚有差以疽發于腦詔大醫診視賜御藥俄卒弼平生無所好惟喜讀書閑暇延引儒士歌詠投壺以爲常所辟如永壽陀滿胡土門紇石烈牙吾塔皆立方面功泊東平愛民省費并邑之間軍民無相訟有古良

將之風

郭仲元與弟阿隣俱中都人大安中同應李雄募人呼仲元爲郭大相公以別阿隣數戰有功貞祐三年俱賜姓完顏除仲元永定軍節度使所將兵號花帽軍最稱強勇頃之兼本路宣撫使遙知河間府事數月改知濟南府權山東東路宣撫副使有衆三萬山東乏糧詔以行省侯摯與之素厚命於彼中應給復欲詣闕面陳恢復河朔之策詔卿兄弟鳩集義旅所在立功忠義之誠皎然可見今求入覲其意固嘉東平方危正賴卿等相爲聲援視兵勢稍緩卽從軍附河屯駐此時卿來未爲晚也尙思戮力朕不汝忘四年改河北宣撫副使令計約涿州刺史從坦等軍圍恢復中都詔以二人軍猥多差爲三等上等備征伐中下給戍守懦弱皆罷去量給地以贍其家紅襖賊千餘據

連水縣遣提控婁室率兵擊破之斬首數百收祝春擒郭偉餘衆奔潰遂復連水縣兼領單州經畧使婁室遷升階職未幾遷授仲元知歸德府上書陝西一路最爲重地潼關禁坑及商州諸隘俱當預備向者中都居庸最爲要害乃山小嶺紫荆遶出我軍腹背受兵卒不能守近日由禁坑出遂失潼關可選精兵分地戍之詔乃置秦藍守禦是年十月令徙軍盧氏改商州經畧使權元帥右都監仲元軍趨商虢會潼關失守復至嵩汝皆弗及興定元年復爲單州經畧使敗宋人二千于龜山復敗步騎千餘于盱眙敗紅襖賊于白里港獲老幼萬餘皆縱遣之宋人圍海州仲元軍高橋令阿鄰領騎遶出其後夾擊之宋兵解去賜金帶優詔獎諭紅襖賊陷曹馬城剽掠徐單之間提控高琬等分兵擊之俘生口二千三年又奏單城已固積糧二十萬

石集鄉義軍萬餘並閉訓練足以守禦乞以所部渡河詔屯宿州與紇石烈德同行帥府事仲元有足疾滿百日詔惟處置機務撫存將士可使李辛出兵四年遷領保靜軍節度兼勸農使五年遷鎮南軍節度使元光元年改知鳳翔府得士庶心大兵圍城身先將卒與臨洮同知顏懿蝦蟇力戰功最便宜超授通遠軍節度使圍解後請受擅除拜之罪宣宗嘉其功優詔獎許遷光祿大夫元帥右監軍授河北東路洮委必刺猛安賜金幣并通犀帶正大間爲兵部尙書皇太后衛尉卒其爲將沈毅有謀南渡後最號有名 阿隣初除通州防禦使遷汴改河間府同知兼清州防禦使將所部兵駐清滄控扼山東轉橫海軍節度使與山東路宣撫副顏懿天澤不相能詔二臣當共濟國事無執偏見妄分彼此尋改鎮泰定軍山東西路宣撫使與仲元

俱加從宜招撫使詔書獎諭阿隣所部黃鶴袖軍駐魚臺者桀
驚不法掠平民劫商旅道路不通有司乞徙于滕州詔阿隣就
便處置頃之破紅襖賊郝定于泗水縣柘溝村生擒定送京斬
之近制賜本朝姓者能以千人敗敵三千者賜及總麻敗二千
人以上賜及大功敗千人以上賜止其家阿隣功止賜一家以
兄守楫及從父兄翁爲請宣宗特詔許之尋改輝州經畧使阿
隣有衆萬五千詔分五千隸東平行省阿隣不欲其衆泣訴我
曹以國家多難奮義相從捐田宅離親戚轉戰至此誓同立功
皆還鄉里今將分配他軍心實艱若乞以全軍分駐懷衛輝州
之間捍蔽大河宰臣奏若遂聽之非惟東平失備他將倣効皆
不可使宣宗以爲然加遙授知河南府事應援陝西阿隣將兵
八千西至潼關聞京兆已被圍游騎至華州陝西行院欲令駐

軍商號拒東向之路阿隣奏臣本援陝西遇難而止豈人臣之節竊惟自古川兵必步騎相參方可得志今乃各有所屬臨難不救互分彼此臣之所統皆步卒願賜馬軍千人則京兆之圍不足解矣。宣宗善之令皇太子諭意阿隣赴難不回而軍勢單弱併付以虢州兵五千使裴崇質進與定元年遷元帥右都監出秦州伐宋宋統制吳筠守皂郊堡城三重據山之鎮乃分兵絕其汲路搃克外城再克其次城宋兵縱火而出邀以騎兵遣步卒襲其後宋兵敗生獲吳筠及將校二百人馬數百匹糧萬石并兵甲衣襖遣使獻捷復敗宋兵于裴家莊六谷中斬五百級墜澗死者甚衆又敗之于寒山嶺龍門關大石渡得粟二千餘石復敗之于稍子嶺斬首二千餘級生擒百人值時宿麥方滋留兵守之三月癸巳宋人爭皂郊堡兵大至我兵敗阿隣戰

沒贈金紫光祿大夫西京留守

完顏霆本姓李名二指中都寶坻人粗知書善騎射輕財好施得鄉曲之譽貞祐初縣人共推爲四鄉部頭招集離散糾合義兵衆賴以安招撫司奏其事遷霆兩官與弟電率衆數千巡邏固安永清間遇授寶坻縣丞充義軍都統劉瑋說使出降霆縛送經畧司遷三階攝寶坻令升都提控遷授通州軍事同知中都食盡遣軍分護清滄河路召募買船通餉道積功領清州防禦同知從仲元保清滄遇授通州刺史河北東路行軍提控功與仲元相埒舊制宜撫方佩金牌因仲元奏乞各賜金牌廷議霆輩忠勇絕人遂與之改大名路提控復取玉田三河香河三縣徙屯濱棣淵留副將孫江守滄州江以城降于王楫復將兵圍觀州霆詐作書與江約同取滄州楫得其書果疑江與霆有

謀召還殺之。寔乃定觀州而還。進官三階充濱棣行軍都提控。未幾。寔授益都府同知充宣差都提控。遷棣州防禦使。賜今姓。屯海州。俄權單州經畧司事。充宣差總領都提控。興定元年四月。濟南泰安勝兗等州土寇竊起。肆行剽掠。行省侯摯遣軍兵討之。招降僞元帥石花五夏全餘黨二萬人。老幼五萬口。權海州經畧副使紅襖賊于忙兒寇海州。寔擊走之。二年。宋高太尉兵三萬駐胸山。寔軍乏糧。采野菜麥苗雜食之。宋兵擣胸山下。隔湖港。寔就港中作暗橋。遣萬戶胡仲莊副統劉贊率死士由暗橋登山。寔引兵四十趨山下。約以昏時舉火爲期。上下夾擊。宋兵大敗。墜澗溺水死者不可勝計。斬高太尉彭元帥于陣。餘衆潰去。遷安化軍節度使。擢其子爲符寶典書。逾月。宋兵復至。寔逆戰。駐兵城外。夜半。宋人乘虛踰城而入。經畧使阿不罕如

失刺率兵扼戰都統溫迪罕五兒副統淵察永成蒲察只魯身
先士卒殺二百餘人城賴以完詔遷五兒等各兩階四年改集
慶軍節度使兼歸德府同知五年改定國軍節度使兼京兆府
同知子充護衛元光元年宣宗從行省自撒奏京兆南山密邇
宋境官民遷避其間者無慮百萬可遣官鎮撫庶幾不生他變
十月擢霆爲安撫使歸德府同知惟宏大司農丞郭皓爲副分
護百姓之遷南山者明年卒

包長壽臨朐府第五將突門族人襲父永本族都管伐宋充緋
副趙軍千戶取床川寨及祐州宕昌辛城子以功進官二階貞
祐初夏人攻會州充統軍使署征行萬戶升副統與夏人戰於
窄土峽先登陷陣賞銀五十兩戰東關堡以功置都統兼充安
定定西保川西寧軍馬都彈壓錄前後功遷授隴州防禦同知

世襲本族都巡檢三年與包世顯包疙疸俱賜姓烏古論氏夏人圍臨洮扼渭堡內外不通統軍司令偵候消息賊二人擒一人問得臨洮及夏兵事勢以勞遷宣武將軍遷授通遠軍節度副使招降諸蕃族及熟羊寨寇秦州遁亡者遷懷遠大將軍升提按典定元年夏人大入隴西長壽拒戰還平涼府治中允宣差鞏州規措官三爲鳳翔臨洮府通遠軍同知二年與提按洮州刺史納蘭記僧分兵伐宋長壽由鹽州鎮進宋人守戍者走保馬頭山合諸部族兵來拒長壽擊敗之復破其援兵四千於荔川寨仰趨宕昌縣破宋兵二千于八斜谷遂拔宕昌進攻西和先敗其州兵明日木波兵三千與宋兵合依川爲陣長壽奮擊宋兵入保城壁不出乃還凡斬馘八千獲馬二百餘牛羊三萬器械軍實甚多記僧由洮州鐵城堡屢敗宋人完軍而還詔

賞鳳翔秦鞏將士遷授長壽隴安軍節度使頃之升總領都捉
控改通遠軍節度使夏人攻定西時第世顯已降夏人執至城
下語長壽曰若不速降卽殺汝第長壽不顧奮戰夏兵退加榮
榮大夫賜金及重幣併釋世顯二子公政重壽免其緣坐詔長
壽曰汝久在戎行盡忠國事世顯之降必不得已汝永念國恩
益思自效未幾夏人復攻會州移兵臨洮長壽伏精兵五千于
定西險要間敗敵三萬騎殺千餘人獲馬數百夏人已破西寧
復犯定西因擊却之斬首三百級旣而三萬騎復至攻城甚急
長壽乘城拒戰矢石如雨夏兵死者數千被創者衆乃解去是
歲卒時賜姓者多東永昌爲溫敦氏親令孤爲和速嘉氏何定
爲必蘭氏馬福德馬栢壽爲夾谷氏各遷一官附見于此
梁佐初爲武清縣巡檢李黻住爲柳口鎮巡檢久之以佐爲都

統敵住副之成直沽寨貞祐二年乂軍遣張暉等三人來招佐
執之翌日劉永昌率衆二十人持文書來署其年曰天賜佐鄰
之麾衆執永昌及暉等併斬之宣宗嘉其功遷佐奉國上將軍
遷授德州防禦使敵住鎮國上將軍遷授河間府同知皆賜姓
完顏氏詔曰自今有忠義如是者金一體遷授

紇石烈牙吾塔亦曰牙忽帶本名志性剛悍喜戰剛貞祐間以
親衛軍從宣撫僕散安真授提控領兵討山東羣盜破巨象等
四壩及馬耳山砦殺劉二祖賊黨四千餘人降賊八千并脅從
民三萬餘人執僞宣差程寬招軍大使程福積功累遷擢通渡
經畧使除元帥左都監行山東西路兵馬都總管兼武寧軍節
度使徐州管內觀察使興定二年遣往泗州赴援至臨淮遇宋
兵三百掩殺殆盡督衆進戰破圍城兵八千俘獲甚衆又圍盱

貽宋人閉門堅守分騎兵掠其境內時遣羸卒薄城誘之宋騎數百來拒設伏斬之太尉領兵來援合擊殺之斬首三百移兵赴青平宋步騎七千突出縱之東走俄薄諸河斬首千餘溺死無筭威震淮泗好用鼓椎擊人故呼曰盧鼓椎其名可以怖兒啼賞功獲賜金帶三年正月又敗宋人於濠州之香山村二月捷於滁州攻宋尤山縣俘其統制蔡從定等援兵至復敗之又拔小江寨殺統制王大遶等又拔輔嘉平山寨俘斬數千獲糧萬斛使人遺宋將書請悉衆來戰一決勝負果能當我之鋒沿邊城邑當以相奉度不能卽宜安分保境何必狐號鼠竊乘陰伺夜爲此妖態臨敵則望風遠遁被攻則閉壘深藏逮吾兵還然後現形耀影以示武此小民尙氣女子有志者猶不爲也切爲彼國羞之先是宋將時青襲破泗州西城將兵復取募死士

以梯衝並進青坂衆南奔陳兵橫絕走路擊之其衆大潰遂復其城因出兵渡淮以報其役破宋圍山賈家等諸寨進逼濠州城東遇邏騎二百擊殺過半芻糧甚艱乃西掠定遠由渦口而還詔遷其官元光元年授京東便宜總帥兼行戶工二部事無不辦至於御下亦頗有術嘗厚待提控胡論出同噐而食其人咸奮遂以戰死未幾宋兵三千潛渡淮至聊林盡伐隄柳塞汴水以斷吾糧道牙吾塔遣精甲千餘破之獲其舟及渡者七百人不汴流復通有詔官軍戰歿者皆廩給其家有司例以楮幣折支自今願支本色令得贍濟毋致失所朝廷從之中半支給時紅襖賊寇壽州剽掠數日而去亟引兵追之偵知尙在孝義等村且焚且戰還遇宋兵數百陣淮南崖擊殺其半賊退進圍邳州討叛將納合六哥焚其樓櫓斬首百餘餘黨顏俊戚誼完

顏乞哥猶拒守方督兵進攻總領劉斌提控黃溫等縛之率軍民迎入城撫慰其衆各使安集又招獲紅襖監軍徐福統制王喜等宣宗大喜進官一階賜金幣重綵將士遷賞有差正大三年十一月北兵攻中興府詔與陝州靈寶二總帥訛可議兵並從行省從宜規畫四年復取平陽五年元圍慶陽六年十月北中遣唐慶等往來議和尋遣幹骨樂來爲小使行省恐世事機因留之十二月將兵救慶陽七年正月戰于大昌原北兵還慶陽圍解詔以爲左副元帥屯京兆自此志氣驕滿遣北使還語甚不遜曰我已準備車馬可戰爾來慶等在旁心魄震蕩殆不忍聞幹骨樂還以此言聞元太宗大怒卽親統大兵入陝西八年牙吾塔棄京兆東還遷居民於河南五月至閭鄉得寒疾不汗而死是歲九月國信使內族垂慶自北使還始知牙吾塔激

怒之語當時以帥臣不知書。俟國乃耳。其爲人殊狠戾。好結小人不聽朝廷節制。尤不喜文士。僚屬有長裾者。以刀截去其餘。每朝使至。輒加凌侮。或困以酒食。辭者併食。不給使餼而去。司農少卿張用章以行戶部過宿。辭有寒疾。不飲。趨左右扶卧於床。灸之數十屢。令妓者佩其銀符。遣往州郡取賕。州將之妻皆遠迎。迎號省差。行首私與厚賄。朝廷不治其罪。子名阿里合。時目曰小鼓椎。特爲元帥在蒲察官奴傳。

古里甲石倫隆安人。武舉登第。爲人剛悍。頗自用。所在與人不合。宣宗以其材勇善戰。每任用之。貞祐二年。累遷副提控太原府判官。與從宜都提控振武軍節度使完顏蒲剌都議拒守。不合交章論列。詔各分統其兵。未幾還太原。同知奏請招集義軍。設置長校各立等差。都統授正七品職。副統正八品。萬戶正九

品千戶正班任使謀克雜班仍三十人爲一謀克五謀克爲一千戶四千戶爲一萬戶四萬戶爲一副統兩副統爲一都統外設一總領提控制可四年遷河東宣撫副使轉絳陽軍節度使權經畧使尋知延安府兼鄜延路兵馬都總管元兵圍忻州詔率兵往援護其軍民咸入太原保全甚衆興定元年七月改節河平軍兼衛州管内觀察使太原知府烏古論德升言其不救汾州命有司議罪詔赦之諭以朕初謂汝勇果爲國盡力故倚以濟事尋聞汝皆酒不法汝旣知悉益當戮力以掩前過十一月復改節鎮西軍兼嵐州管内觀察使行元帥府事二年四月奏言去歲北兵破太原河東內郡皆駐以精甲實以資儲視邊城尤爲完富然兵一至相繼淪沒游兵入嵐州境兵寡而食不足惟其上下協同表裏相應官民將士悉力扞禦遂獲安帖當

大軍初入郡縣倉皇若非帥府控制則輿管保德岢嵐寧化皆不可知矣今防秋不遠乞朝廷量加旌賞務令益盡心力易以鎮守詔樞密院有功者各遷一級仍降授空名宣勅三年二月又奏向者并汾旣破兵入內地臣謂必攻平陽將及潞州還當由龍州谷以入太原請兵扼其歸路朝廷不以爲然旣而皆如臣料始太原失守河東民皆擄老幼徙居山陰無人從賊意敵不能久留且望官軍復至今敵居半歲遣步騎擾諸保聚官軍竟無至者民其能久抗乎夫太原河東之要郡平陽陝西河南之藩籬也若敵兵久不去居民盡徙屯兵積糧以固基本復擾吾郡縣之未殘者則邊城指日皆下矣北路不守則南路爲邊去陝西河南益近臣竊憂之故復請兵以圖戰守而樞府檄臣并將權太原治中郭通祖義軍萬餘人糧五千石會汾州權元

帥右都監抹撚胡刺復太原臣名通祖欲號令其衆通祖不從
但稱李天祿等義軍未嘗親閱問糧曰散在數處蓋其情本欲
以已有兵糧冀朝廷見用以取重職不可指爲實用也然臣已
遣提控石盡吾里忻等領軍以往但敵勢頗重而往者皆新集
白徒絕無精銳恐不能勝乞於河南陝西量分精兵以增臣力
仍令陝西州郡近河東者給之資糧更令南路諸軍緩敵之南
以分其勢如此庶幾太原可復也詔乃分陝西河東行省糧與
之請兵之事以方伐宋不從三月又奏頃者臣所遣提控吾里
忻引官兵義兵共圖收復太原擬得注授九品之職及有功軍
士宜速賞之以請于朝執政以爲賞功罰罪皆須中覆臣謂河
東去京師遠移報往返率數十日劄官軍皆敗亡之餘鋒銳畧
盡義兵亦不習行陣無異烏合以重賞誘之猶恐不爲用況有

功而久不見執乎夫衆不可用則不能退敵敵不退則太原不可復太原不可復則平陽之勢日危而境土日蹙矣今朝廷抑而不許。不過慮其濫賞耳。借使有濫賞之弊。其與失太原之害孰重。詔乃始從其請。自治中及從七品以下職四品以下散官。並聽遷調。是月復言曰。者遣軍討擒敵壘。欲分石州兵五百權屯方山。勦殺土寇。且備嵐州。而臣知蒲察桓端拒而不發。又召寧邊軍節度同知姚里鴉與之議。竟不聽命。近委石州刺史納合萬家。推行六部辭。以他故約武州刺史郭憲率所領併進。亦不至臣。狠當方面之任。而所統官屬。並不稟從。乞朝廷嚴爲懲誡。庶人知職分。易以責辦。等臣惡之。反奏桓端鴉鶻已經奏改石倫身兼行部。不自規畫。而使萬家往來。應給石州無人恐。亦有失武州邊郡正當兵衝。使憲率軍離城敵。或乘之萬家等。

不從未爲過也上以爲然因遣諭石倫卿嘗任歸德行院衛州防備之事非不素知乃屢以步騎爲請比免卿罪特授三品卿當誓以死報今自謂河南之衆必不可分但圖他日得以藉口所爲如此豈報國之道哉萬家等若必懲戒彼中誰復可使者始爲容忍可也閏三月石倫駐兵太原之西俟諸道兵至進戰六月振威軍萬戶王章督軍萬戶齊鎮誣保德州刺史李木魯銀未哥專恣憐酷私造甲仗將謀不軌殺之仍滅其家石倫密令同知把蒲刺都設計召章等擒而族誅之朝命蒲刺都就擢州撫安其衆遷石倫金安軍節度使行葭州元帥府事時元帥州事立慮夏人入寇遣納合買住以兵駐葭州石倫不奏輒分留其兵千八百論罪當絞遇赦乃止除名元光元起爲鄭州防禦同知令白衣領職正大八年大兵入河南以權元帥左都

監令代昌武軍節度使粘葛全周領兵詔諭卿先朝宿將甚有
威望故起拜是職昌武元帥蘇椿武監軍皆曉兵事宜與同議
勿復如前不睦時游兵已至許幾爲所獲數日兩省軍敗潰軍
踵來石倫遣歸順軍提控嵐州人高珪往諷因持在州軍馬糧
草數日奔于元軍仍告以城池深淺俄大兵至城下令鳳翔府
韓壽孫持檄招降言三峯敗狀石倫與椿就市中斬之無何武
監軍偏裨何魏輩開東門內族按春開南門夾谷太守開西門
元軍乃入城石倫投解後井中全周自縊州廨武監軍怒其不
迎降亦殺之全周名暉字子陽策論進士興定間爲徐州行
樞密院叅議官上章論惟名與器不可假人自古帝王靡不爲
重今之金銀牌卽古符節也其上有太祖御畫往年得佩者甚
難兵興以來授予頗濫市井道路黃白相望恐非所以示信於

下也乞實惜之有所甄別上以語高琪等奏時方多難急於用人何得輒吝語乃如故椿大名人初守大名歸順于元正大二年九月自大名奔汴詔置許州椿初被擒問以大名南奔何故反或椿曰我本金朝人無力故降我歸國得爲大官何謂反耶大將怒其不屈卽殺之